

An Leipreachán

Foireann

Aisling

Deirdre

Maggie

Bríd

Leipí an Leipreachán

Seoirse

Radharc 1

Taobh amuigh. An Fhóraois. Tá díog ar dheis agus stumpa ar chlé. Tagann Aisling isteach. Amharcann sí thart. Scairteann sí ar chlé.

Aisling Goitse, a Mhám, tá neart adhmaid istigh anseo.

Tagann Deirdre isteach le bascaed uibheacha.

Fág na huibheacha ansin a Mhám.

Deirdre Ceart go leor.

Uibheacha ar talamh. Aisling ar a glúine ag bailiú adhmaid.

Aisling Tá sé go réidh againn go leor adhmaid a thabhairt 'na bhaile inniu, a Mhám, bhí mise conáilte aréir.

Deirdre Bhí is mise, ach chan iontas ar bith sin. Tá an d'fion uilig le cóiriú is níl fear ar bith le cuidiú linn. Liam bocht, i bhfad ró-luath a chuir Dia scairt air.

Comhartha na croise.

Cha bheadh seisean i bhfad ag cóiriú an dín.

Aisling M'athair bocht....

Suíonn sí ar an díog.

agus m'uncail Domhnall bocht fosta.
Mí-ádh ar fad a bhí ann gur bhuaile an tintreach an crann a bhí siad a ghearradh.

Lámha amach.

Deirdre Toil Dé, a thaisce, toil Dé.

Tiontaíonn sí agus siúlann ar chlé.

Beirt fhear láidir. Cha raibh eagla orthusan roimh an Tiarna Chromwell.

Aisling Sea, an Tiarna Chromwell. Cad é atá muid ag dul a dhéanamh fán chíos, a mhám?

Deirdre Níl a fhios agam.

A lámh dírithe ar na huibheacha.

Sé'n t-aon airgead atá agam ná na pingeacha a gheobhaimid ar na huibheacha.

Aisling

Is ní leor sin?

Deirdre

Ní leor sin. Caithfidh an Tiarna muid amach.

Seasann Aisling.

Aisling

Seasfaidh muid suas ina éadan. Ní ligfidh muid dó muid a chaitheamh amach.

Bogann Deirdre ar chlé.

Deirdre

Gan an cíos déanfaidh sé sin. Níl trócaire ar bith ann.

Aisling

Níl eagla ormsa roimhe.

Deirdre

Tá eagla ormsa roimhe is cad chuige nach mbeadh? Tá eagla ar achan duine eile roimhe.

Aisling

A Mhám, cha labhraíonn sé. Níl focal as a bhéal. Cad chuige nach labhraíonn sé?

Deirdre

Deir siad go bhfaca sé Leipreachán agus bhain sé an oiread sin geite amach as gur chaill sé a ghlór.

Aisling

Leipreachán?

Glúine.

Cha raibh a fhios agam go raibh a leithéid de rud ann.

Deirdre

Níl a fhios agam. Urch!

Tógann sí bataí.

Tá léar rudaí sa domhan seo nach dtuigeann muid, a Aisling.

Aisling

Bheadh sé deas Leipreachán a fheiceáil.

Bataí ar an díog.

Cha bheadh eagla ormsa roimhe. Nach mbíonn pota óir i gcónaí leo?

Deirdre

Sin an rud a deir siad. Urch!

Bataí ar an díog.

Ach ní dóigh liom go mbeadh Leipreachán ar bith sásta a phota óir a thabhairt suas.

Aisling

Chuideodh sin leis an chíos.

Deirdre Arú, a thaisce, le pota óir thiocfadh leat pálás a cheannach, gan chaint fán chró bheag atá againne.

Tagann Maggie agus Bríd isteach.

Maggie Beannacht Dé ar an obair.

Bríd Bhail, a Aintín, bhail, a Aisling.

Deirdre Cad é mar atá sibh inniu?

Aisling Goitse, a Bhríd, tá neart adhmaid anseo.

Maggie A fhad is nach dtagann an Tiarna orainn.

Cuireann sí na huibheacha ar an talamh.

Bríd Tá a fhios agaibh nach bhfuil cead againn an t-adhmad seo a bhailiú.

Aisling Chan fheicimse ciall ar bith le sin.

Tógann sí bataí.

Tá sé ina luí ar an talamh ag dul amú.

Deirdre Ciall? Cá huair a bhí ciall le rud ar bith a dhéanann an Tiarna?

Lámha dualta.

Muid a choinneáil faoi chos sin uilig atá de dhíobháil ar an fhear sin.

Bríd FR ag bailiú adhmaid.

Bríd Má dhéanann muid deifir beidh muid ar shiúl arís sula dtagann duine ar bith.

Maggie ar chúl.

Maggie Tá mise ag dul isteach go Baile na gCrann.

Deirdre chun tosaigh.

Deirdre Tá mise ag dul isteach go Baile na gCrann fosta. Tá cúpla dosaen liom féin le díol.

Méar dírithe.

Ach ar an drochuair ní bheidh go leor agam don chíos amárach.

Maggie Cha bhíonn sé agamsa ach oiread.

Seasann Aisling. Bataí ar an díog.

Aisling

Nach diabhal atá sa Tiarna ag cur an chíosa suas chomh ard sin?

Aisling ar a glúine arís.

Deirdre

Sin an sórt duine é. Tá sé ag iarraidh a chuid tionóntaí uilig a chaitheamh amach as an fhoraois sa dóigh is go dtig leisean a chuid muca a chur ann. B'fhéidir nach gcaithfeadh sé amach muid.

Bríd

Bataí ar an díog.

I ndeireadh an lae tá muintir s'againne iná gcónaí anseo leis na cianta.

Deirdre

Tá.

Chun tosaigh.

Bhí muid anseo i bhfad roimh na Tiarnaí talún.

Maggie

Cha ndéanann sin difear ar bith. Muna bhfuil an cíos againn amárach beidh muid caite amach agus sin sin.

Bríd

Sea, beidh muid caite amach. Cá rachfas muid má tharlaíonn sin.

Deirdre

Sin an cheist, a thaisce. Beirt bhaintreach agus beirt chailíní, cá háit a dtig linn a dhul?

Maggie

Níl a fios againn áit ar bith eile ar an domhan.

Deirdre FL.

Deirdre

Cha raibh mise amuigh as an fhoraois seo i mo shaol.

Aisling

Níl mise ag iarraidh an fhoraois a fhágáil.

Tiontaíonn Deirdre. An Tiarna isteach. Scread ó Dheirdre.

Deirdre

An Tiarna!

Uilig ar a nglúine ach Aisling.

A Aisling, le do thoil.

Aisling Síos. Scaipeann an Tiarna an t-adhmad a bhí bailithe. Caitheann sé Bríd ar an urlár. Scread uaithi. Cuireann sé a chos isteach i mbascaed Mhaggie ag briseadh na n-uibheacha.

Maggie

Ná déan. Óh!

Deirdre

Ná déan, ó ná déan. Sin uilig atá agam.

Briseann sé na huibheacha agus tosaíonn sé ag gáire.

Imíonn sé.

Aisling Ó, a Mhám, char fhág sé ubh amháin leat. Tá siad uilig briste.

Aisling ar chlé.

Hóí, a Thiarna, níl ionat ach...

Beireann an triúr uirthi agus tógann siad í ar dheis.

Bríd Stad, a Aisling.

Aisling Lig amach mé.

Aisling FR.

Maggie Coinnigh socair.

Deirdre A Aisling, bíodh ciall agat. Ná tarraing fearg an Tiarna anuas orainn.

Aisling Lig amach mé. Is mór an trua nach fear a bhí ionam.

Léimeann sí ar an bhosca.

Sheasfainn in éadan an fhir sin.

Deirdre Bhail, a thaisce,

Anonn chuici.

chan fear atá ionat agus níl maitheas ar bith duitse nó dúinne a bheith ag scairteadh leis an spéir.

Maggie Tá an ceart ag do mháthair, a Aisling. Níl a dhath a thig linn a dhéanamh.

Amharcann Bríd amach ar chlé.

Bríd Thiocfadh leis muid uilig a chur chun báis.

Aisling Sin an rud atá ciotach.

Anuas ón bhosca.

Tá eagla an domhain ar achan duine roimhe, agus a fhad is gur sin an cás thig leis a rogha rud a dhéanamh.

Deirdre Ó, a Aisling, tá an cumhacht uilig ag an Tiarna, a Aisling...

Chuici.

...agus níl ionainn ach seangáin faoina chos. Caithfidh sé muid amach amárach. Goitsígí, níl a dhath anseo dúinn.

Aisling ar a glúine.

Aisling Níl mise ag fágáil gan an t-adhmad.

Deirdre Chonaic tú an rud a rinne sé. Cha dtig linn adhmad a bhailiú anois.

Aisling Thig liomsa.

Seasann sí.

Mar a dúirt mé leat, bhí mé conáilte aréir.
Agus más rud é gur seo an oíche dheireanach domh i mo theach féin, chan fuar a bheas mé.

Tosaíonn sí ag bailiú adhmaid.

Deirdre Caithfidh muid dul isteach go dtí an baile.

Aisling Cad chuige anois?

Deirdre Caithfidh muid áit éigin a shocrú don oíche amárach má chaitheann sé muid amach.

Maggie Tá col ceathrar againn ansin, Nuala. Ta mé cinnte go gcuideoidh sí linn.

Deirdre Tá súil agam. Is leis an Tiarna na tithe uilig i mBaile na gCrann. Thiocfadh leofasan a bheith caite amach fosta.

Bríd Déarfainn gur sin an rud atá ar intinn aige déanamh.

Deirdre Maróidh an fuacht muid. Tá an geimhreadh ag teacht.

Aisling Níl muid caite amach go fóill, a Mhám.

Deirdre Ó, a Aisling, níl, ach beidh.

Lámha ar ghualainn Aisling.

Sin a bhfuil dó. Goitsígí.

Aisling Níl mise ag dul libh.

Bríd Fanóidh mise le hAisling. Thig liom súil a choinneáil amach di.

Maggie Maith go leor. Goitse, a Dheirdre.

Deirdre Cha dtig liom na cailíní a fhágáil leo féin. Gabh thusa agus labhair le Nuala. Thig leis an bheirt agaibhse adhmad a bhailiú, coinneoidh mise súil amach.

Chuig Maggie. Siúlann an bheirt ar chlé.

Tchífidh mé thú tráthnóna, a Mhaggie. Bí cúramach.

Maggie Bígí sibhse cúramach. Má thagann an Tiarna oraibh arís. Ó, cad é'n mhaith domh a bheith ag caint. Slán.

Triúr Slán.

Maggie amach. Aisling ar an díog. Amharcann sí ar chlé.

Aisling An créatúir, ní fheiceann sí dóigh ar bith amach as.

Bríd Siocair nach bhfuil dóigh ar bith amach as.

Aisling Amaidí, bíonn i gcónaí dóigh amach as.

Deirdre Tá tú óg, a thaisce, ach molaim do chrógacht.

Chuici.

Crógacht ar bith a bhí ionaimse chaill mé é i bhfad ó shin. Seo, fanfaidh mise amuigh anseo.

Méar dírithe.

Má thagann duine ar bith bhéarfaidh mé scairt daoibh.

Amach léi ar chlé. Tá an bheirt ag bailiú adhmaid.

Bríd Amharc, a Aisling.....

Chuig an díog.

...is cuma fá cad é chomh dóchasach is atá tú, ta na huibheacha uilig briste. Níl airgead ar bith againn. Caithfidh an Tiarna muid amach.

Seasann Aisling.

Aisling An diabhal gan trócaire. Éist liom, a Bhríd, caithfidh muid seasacht de shórt éigin a dhéanamh.

Bríd Cad é an cineál seasacht? Is cailíní muid. Tá saighdiúirí ag an Tiarna. Tá...éist!

Amharcann sí amach FR.

Tá duine inteacht ag teacht.

Aisling Cé atá ann?

Bríd Níl a fhios agam. Cuir an t-adhmad sin ar shiúl.

Aisling Goitse, a Bhríd. Ní fheicfidh sé muid istigh anseo.

Tógann siad an t-adhmad ón díog. Téann siad i bhfolach sa díog.

Tagann Leipreachán isteach agus suíonn sé ar an stumpa ag caitheadh a pháip. Tá pota óir leis.

Leipreachán

Ó is maith liom an suaimhneas. An suaimhneas, an suaimhneas. Is maith liom an suaimhneas go maire sé go deo.

Suíonn sé ar an stumpa.

Mé féin is mo pháip, me féin is mo pháip, me féin is mo pháip go mbeidh tobac ann go deo.
Mo phota beag óir, mo phota beag óir, mo phota beag óir
Beidh tú liomsa go deo.

Amharcann sé ar na huibheacha.

Déanfaidh mé omelette.
Mo hata 's mo chóta, mo hata 's mo chóta...

Tagann an bheirt amach.

Aisling

Hello.

Titeann an Leipreachán ar chlé. Smig ar an stumpa.

Leipreachán

Cad é atá sibhse ag déanamh anseo?

Aisling

Tá muid ag bailiú adhmaid. Ach caithfidh muid fanacht go bhfuil sé rud beag níos dorcha ar eagla go dtiocfaidh an Tiarna ar ais.

Seasann an Tiarna.

Leipreachán

An Tiarna?

Aisling

Sea, an Tiarna Cromwell.

Leipreachán

Ó, an fear sin.

Bríd

Ní duine deas é.

Leipreachán

B'fhéidir nach ea. Ach cad é rud olc is cad é rud maith? Dá n-íosfainnse coinín bheadh sé maith domhsa ach...

Téann sé ar chlé go bagartha. Cúlaíonn A agus Bríd.

...an mbeadh sé maith don choinín?

Twirl. Dhá lámh amach. Cúlaíonn A agus B. Suíonn sé.

Cad é a déarfadh teaghlach an choinín?
An ndéarfadh siad gur drochduine mé?

Luíonn sé ar an díog.

Ach dá dtabharfainn píosa coinín do bhochtán a raibh ocraí air déarfadh sé gur fear maith mé.

Seasann sé ar an díog.

Tá se casta nach bhfuil?

Aisling

Tá olcas ann is tá maitheas ann ach níl maitheas ar bith sa Tiarna.

Leipreachán

Nach bhfuil?

Siúlann se ar chlé. Tiontaíonn sé go tapaigh.

Agus an bhfuil olcas ionatsa?

Aisling

Níl.

Leipreachán

Nach bhfuil?

Chuici go tapaidh.

Cad é atá tú ag déanamh anseo?

Aisling

Tá mé ag bailiú adhmaid don tine.

Leipreachán

Agus cé leis an choill seo?

Aisling

Is leis an Tiarna é.

Leipreachán

Agus ar thug sé cead daoibh a bheith ag bailiú adhmaid?

Aisling

Cha dtug. Sin an rud...

Leipreachán

Ugh, ugh! Is leis an Tiarna an choill, is leisean an t-adhmad. Níl cead agaibh é a bhailiú mar sin de tá sibh ag goid an adhmaid.

Aisling

Níl muid.

Leipreachán

Is gadaithe sibh.

Aisling

Óhh!

Ar dheis léi. Twirl ó Leipí, cos ar stupa, píopa ina bhéal.

Bhailigh muid an t-adhmad seo ó bhí mise i mo thachrán. Rinne mo mháthair romham é is a máthair roimpi an rud céanna.

Leipreachán

Is cuma fá chomh fada is tá sibh ag déanamh seo.

FR. Díríonn sé a mhéar.

Is gadaíocht atá ann is a bheas ann go deo.

Suíonn sé ar an talamh.

An duine deas é gadaí?

Suíonn sé.

An bhfuil freagra agat do sin?
Ach ionracas a ghirsigh, sin rud fiúntach.
Caithfidh sin a bheith ionat go smior.

Aisling

Ná tabhair gadaí ormsa. Amharc.

Tógann sí píosa adhmaid.

Tá seo uilig ina luí ar an talamh ag lobhadh.

Bríd

Síos fríd na cianta bhí i gcónaí cead ag na teaghlaigh é a bhailiú. Anois, siocair go dtagann Tiarna úr isteach anseo níl an cead sin againn.

Seasann Aisling.

Aisling

An bhfuil cothrom na Féinne ansin? Níl.
Tá sé de cheart againn an t-adhmad a bhailiú.

Leipreachán

Mar sin de is leatsa an choill.

Aisling

Chan ea.

Seasann Leipí.

Leipreachán

Bhal tá tusa ag déanamh amach na rialacha.

Fearg ar Aisling.

Aisling

A Bhríd, cuidigh liom anseo. An síleann tusa go bhfuil muid ag gadaíocht?

Bríd

Níl a fhios agam.

Siúlann ar chlé dhá choiscéim. Tiontaíonn sí agus ar dheis léi.

B'fhéidir nár chóir dúinn é a...

Aisling

Arú, a Bhríd, seas suas duit féin uair amháin i do shaol.

Anonn léi.

Éist thusa liomsa, a Leipreacháin, nó an bhfuil ainm ceart ort?

Téann Leipí FL.

Leipreachán

Ah bhal anois, dá n-inseoinn sin duit chaillfinn mo chumhacht.

Tiontaíonn se go tapaigh. Seasann sé ar an stól.

Tabhair Leipí orm, déanfaidh sin cúis.

Baineann sé de a hata.

Leipí an Leipreachán.

Aisling CS.

Aisling

A Leipí, cha dtuigeann tusa na rudaí atá ag dul ar aghaidh thart anseo. Amharc chomh mór is atá an choill seo.

Téann sé na mílte an bealach sin, agus an bealach sin agus an bealach sin agus i dtaca leis an bhealach sin, níl deireadh leis. Tá neart spáis d' achan duine ach níl an Tiarna úr sásta le sin. Tá seisean ag iarraidh muid uilig a chaitheamh amach ar an tsráid.

Aisling chuig Leipí le fearg.

Bhí tusa ag caint fá ionracas. An bhfuil sin ionraic?

Leipí

Socraigh, socraigh.

Aisling

Socraigh!

Tagann Deirdre isteach.

Deirdre

A Aisling, a Aisling. Cad é an scairteadh atá ort, a Aisling. An bhfuil tú ag iarraidh an Tiarna a tharraingt anuas orainn?

Leipí anonn chuici. Twirl.

Ó, cé hé seo?

Leipí

Leipí an Leipreachán. Do shearbhónta, a bhean uasal.

Deirdre

Leipreachán? Goitsígí, a ghirseachaí imeoidh muid.

Aisling

Fan bomaite a Mhám, ní fheicimse dochar ar bith ann ach amháin a bhéal mór.

Leipí

Ah anois, fán bomaite...

Aisling chuige.

Aisling

Fan thusa bomaite. Chuala mé tú ag ceol fá do phíopa.
Tá grá an domhain agatsa do do phíopa nach bhfuil?

Ceolann sí. An bheirt ag damhsa.

Mé féin is mo phíopa, mé féin is mo phíopa, mé féin is mo phíopa go mbeidh tobac ann go deo.

Tabhair domh an píopa sin bomaite.

Leipí

Eh!

Aisling

Le do thoil.

Tugann sé an píopa di.

Anois, dá ndéanfadh an Tiarna dlí amárach ag rá nach bhfuil cead ag duine ar bith tobac a chaitheamh san fhoraois cad é a dhéanfá.

Leipí

Cosc ar tobac. Ná bí amaideach, a ghirsigh, cé a chuirfeadh dlí amaideach mar sin i bhfeidhm?

Aisling

An fear céanna is a chur cosc ar bhochtáin mar muidinne ag bailiú píosaí beaga adhmaid mar seo.

Tógann sí píosa adhmaid.

Ach an nglacfa le dlí mar sin nó an gcaithfeá do pháopa i ngan fhios dó.

Leipí

Tchím do phointe.

Twirl.

Caithfidh mé dul agus smaoiniam air seo uilig.
Mo pháopa.....le do thoil. Cosc ar tobac éh? Máigh ó.

Amach leis ar dheis.

Deirdre

Goitsígí, imeoidh muid anois nuair atá sé ar shiúl.

Téann Bríd chuig an stumpa. Tógann sí an pota óir.

Bríd

Amharc seo, a Aisling, d'fhág sé an t-ór ina dhiaidh.

Deirdre

Lorda, pota óir.

Tógann sí cuid den ór agus ligeann sí dó titim ar ais.

Saibhreas an domhain.

Bríd

Tá muid saibhir.

Aisling

Níl muid saibhir mar chan linne an t-ór.

Bríd

Ach d'fhág sé é ina dhiaidh.

Aisling

Beidh sé ar ais fána choinne.

Bríd

B'fhéidir nach mbeadh.

Aisling Is cuma, is le Leipí é.

Deirdre Tá an ceart ag Aisling, a Bhríd. Ní linne é.
Fág é agus imeoidh muid.

Tógann Bríd píosa.

Bríd Ach le píosa amháin den ór seo thiocfadh linn an cíos a íoc go ceann bliana.

Tógann Aisling an t-ór uaithi.

Aisling Is gadaíocht a bheadh ansin agus chan gadaithe muid.

Deirdre Ceart agat. Char ghoid mé leathphingin i mo shaol agus níl me chun toiseacht anois. Tá prionsabail againn.

Bríd Beidh muid caite amach ar an tsráid amárach lenár gcuid prionsabal.

Aisling Tá sin níos fearr ná a bheith ainmnithe mar ghadaithe.
Seo, tóg an t-adhmad agus imeoidh muid.

Bailíonn siad suas. Leipí isteach agus ar an díog.

Leipí Fan bomaite. An bhfuil sibh ar shiúl mar sin?

Aisling Tá. Slán leat, a Leipí, tú féin is do phápa.

Amharcann Leipí ar an ór. Téann sé ar a ghlúin.

Leipí Óh! Char ghlac sibh an t-ór.

Aisling Char ghlac.

Deirdre CS.

Deirdre Is leatsa é. Cad chuige a nglacfaimisne é?

Seasann sé.

Leipí Tá léar sa domhan is bheadh sé leo.

Aisling Mar a d'inis mé duit cheana, chan gadaithe muid.

Leipí Tchím sin anois.

Baineann sé de a hata is a fhéasóg.

Chan gadaithe sibhse...

Anuas leis.

...is chan Leipreachán mise.

Iontas orthu uilig.

Aisling Agus cé thusa murar Leipreachán thú?

Leipí Is mise Seoirse Chromwell, mac an Tiarna.

Bríd Mac an Tiarna?

Cúlaíonn siad uilig.

Aisling Chuir tú an dallamullóg orainn, a Sheoirse.

Leipí Bhí cúis leis.

Aisling Is dóiche go mbeidh do chuid saighdiúirí anseo gan mhoill?

Leipí Saighdiúirí? Cén fáth a mbeadh saighdiúirí ag teacht anseo?

Deirdre Is fearr dúinne imeacht, a Aisling.

Leipí Fan. Caithfidh muid stad a chur le m'athair. Níl trócaire ar bith ann.

Aisling Bhail, ta a fhios againn sin. Mharaigh a chuid saighdiúirí fear inné. Chroch siad é siocair nach raibh an cíos aige.

Tagann Maggie isteach.

Maggie Éist liom, a Dheirdre...

Déanann Deirdre comhartha.

Ó, cé seo?

Seoirse Is mise Seoirse.

Deirdre Mac an Tiarna.

Maggie Coisriceadh Dé orainn.

Deirdre a lámh ar ghualainn Mhaggie.

Deirdre Cad é an scéal, a Mhaggie?

Maggie Níl Nuala ábalta cuidiú linn. Tá siadsan ag dul a bheith caite amach fosta.

Deirdre Sin é mar sin. Amárach caithfidh sé muid uilig amach agus níl áit ar bith againn le dul. An bhfaca tú an Tiarna?

Maggie an bealach seo. Níl sé ach deich mbomaite i mo dhiaidh.

Deirdre Ó, goitsí. Tá an Tiarna ag teacht Caithfidh muid imeacht.

Bogann siad ar chlé.

Seoirse

Fan...

Stadann siad.

...cuideoidh mise libh.

Aisling

Cad chuige a bhfuil tusa ag iarraidh cuidiú linne

Seoirse

Mar tchím anois go bhfuil m'athair mícheart. Leis an fhirinne a rá, bhí a fhios agam sin le tamall fada.

Dúirt sé gur gadaithe a bhí ionaibh, ach d'fhág mise pota óir ansin agus char ghlac sibh é. Cruthaíonn sin sibh.

Anois tá plean agam ach caithfidh sibh cuidiú liom.

Aisling

Cad é an sórt plean.

Seoirse

Níl ach rud amháin a bhfuil eagla ar m'athair roimhe.

Sé sin Leipreacháin.

Cuireann sé air a hata.

Ach...an t-am seo beidh níos mó ná Leipreachán amháin i gceist.

Aisling

Cad é atá tú ag rá?

Seoirse

Beidh sibhse gléasta suas fosta.

CR. An ceathrar acu ag amharc ar a chéile.

An bhfeiceann sibh an bosca sin?

Aisling, Bríd, Deirdre agus Seoirse ag amharc amach. Lámh chlé Bhríd ar ghualainn Aislinge. Deirdre in aice le Maggie.

Deirdre

An bhfuil éadaí leipreacháin sa bhosca?

Seoirse

Tá. Déanaigí réidh go gasta.

Amach leo. Fanann Seoirse ar dheis ag labhairt leo.

Anois, nuair atá sibh réidh, Deirdre, fan thusa agus Maggie ar an taobh seo. A Aisling, tusa agus Bríd ar an taobh eile. Is cuma cén bealach a théann sé beidh Leipreachán roimhe.

Siúlann sé ar chlé ag amharc amach.

Ó is maith liom an suaimhneas. An suaimhneas, an suaimhneas. Is maith liom an suaimhneas go maire sé go deo.

Seasann sé ar an díog.

Mé féin is mo phíopa, mé féin is mo phíopa, mé féin is mo phíopa go mbeidh tobac ann go deo.

Anuas leis.

Mo phota beag óir, mo phota beag óir, mo phota beag óir

Fágann sé an pota óir i lár an stáitse.

Beidh tú liomsa go deo.
Mo hata 's mo chóta, mo hata 's mo chóta...

Tagann an Aisling agus Bríd isteach gléasta.

Aisling Tá muid réidh.

Seoirse Maith sibh. Anonn ansin libh. Coinnígí i bhfolach.

Aisling Beidh sé deas scanradh maith a thabhairt don Tiarna.

Bríd Tá sé in am dúinn seasacht a dhéanamh.

Amach leo.

Seoirse An bhfuil sibhse réidh, a Dheirdre?

Cluinimid Deirdre amuigh.

Deirdre Tá.

Seoirse Maith sibh. Gabhaigí i bhfolach.

Aisling isteach.

Aisling Tá an Tiarna ag teacht.

Seoirse Maith go leor beidh mise anseo sa díog.

Tiarna isteach chuig an phota. Seoirse amach.

Ahá! Tá tú marbh anois.

Scread ón Tiarna. Ritheann sé BL. Aisling isteach.

Aisling Ahá! Ba seo do lá deireanach.

Ritheann sé BR. Deirdre isteach.

Deirdre Ahá! 'Sé marbh a bheas tú.

Ritheann sé FL. Bríd isteach.

Bríd Ahá! Crochfaidh muid thú.

Ritheann sé FR. Maggie isteach.

Maggie Ahá! Tar chugam.

Tiarna ar a ghlúine CS iad uilig thart air a bhuaileadh leis na hataí. Siúlann siad thart air uair amháin.

Uilig Leipreachán, Leipreachán...

Seoirse Fág an áit seo agus ná tar ar ais.

Ritheann sé amach CL. Iad uilig ag gáire.

Aisling An mbeidh sé ar ais?

Seoirse I ndiaidh an scanraidh sin?

Siúlann sé chun tosaigh.

Ní bheidh. Tá sé ar shiúl ar mire agus tá mé cinnte nach bhfeicfidh sibh é níos mó.

Baineann siad na hataí díobh.

Deirdre Go raibh maith agat, a Sheoirse, tá muid iontach buíoch duit.

Seoirse Tá mise buíoch daoibhse. Is drochdhuine a bhí i m'athair agus mhill sé saol na ndaoine. Ní tharlóidh sin arís.

Aisling Cad é fán chíos.

Bríd chun tosaigh.

Bríd Sea. Cad é fán chíos.

Seoirse Déan dearmad de. Beidh sos bliana ar an chíos d'achan duine.

Caitheann siad na hataí san aer. Gáire mór.

Anois tá cuireadh agaibhse theacht chuig an teach mór anocht fá choinne an dinnéir.

Deirdre Muidne sa teach mór?

Bríd Cha dtig linn dul áit ar bith leis na héadaí atá orainn.

Seoirse Tá neart éadaí sa teach mór. Tagaigí liom anois agus thig libh déanamh réidh. Agus a Aisling...

Baineann sé do a hata.

...cad é mar ba mhaith leatsa fanacht sa teach mór ó seo amach.

Aisling

Cad é atá tú ag rá?

Brid

Sílim go bhfuil sé ag iarraidh tú a phósadh.

Aisling

Níl sé ag rá sin.

Seoirse

Tá mé. Smaoinigh air. Bheifeá mar Bhantiarna.

Aisling

Cad é do bharúil a Mhám?

Deirdre

Braitheann sin ortsa, a chroí.

Aisling

Tchífidh mé.

Seoirse

Tá sin maith go leor domhsa. Goitsigí.

Soilse.